

आकाशवाणी

खास-खास खबरां:-

1. प्रधानमंत्री नरेन्द्र मोदी अज्ज IIT दिल्ली दे 57में दीक्षांत समारोह गी सम्बोधित करडन।
2. भारती भुगतान परिशद-PCI नै आखेआ जे UPI दे माध्यम कन्नै कीते जाने आहले डिजिटल भुगतान उपभोक्ताएं आस्तै मुफ्त बने दे रौहगंन।
3. भारत ने बदेशी अंशदान विनियमन संशोधन बिल पर अमरीका दे सांसदे आसेआ जताए गेदे ऐतराज गी खारिज करी दिता ऐ।
4. झारखंड च JPSC ते JSSC म्तेहानें च कथित अनियमितताएं गी लेइयै जारी छात्र आंदोलन बश्कार कल संज्ञा सरकार ते विद्यार्थियें दे प्रतिनिधिमंडल बश्कार पैहली औपचारिक गल्लबात होई।
5. अमरीकी सीनेट ने रूस थमां तेल खरीदने आले चीन ते होरनें मुल्खें गी सजा देने सरबन्धी बिल पास करी दिता ऐ।
6. कोरिया मासटर्स सुपर 300 बैडमिंटन प्रतियोगिता च भारत दी अश्मिता चालिहा ते रक्शिता रामराज महिला सिंगलस दे सेमीफाईनल च पुज्जी गेइयां न।

<><><><><><>

PM- IIT Delhi

प्रधानमंत्री नरेन्द्र मोदी अज्ज IIT दिल्ली दे 57में दीक्षांत समारोह गी सम्बोधित करडन। ओह 3 जहार शा मते विद्यार्थियें गी सम्बोधित करडन जिंदे च ग्रैजुएट ते पोस्ट ग्रैजुएट विद्यार्थियें दे कन्नै 587 शोधर्ता बी शामिल होगंन। प्रधानमंत्री होरें

सोशल मीडिया दी पोस्ट च आखेआ ऐ जे IIT दिल्ली ने शोध ते नमिएं काहडें दे खेतर च महत्वपूर्ण जोगदान दिता ऐ। उ'नें आखेआ जे ओह इस संस्थान दे विद्यार्थियें ते शिक्षकें बशकार मजूद होने गी लेइयै मते उत्साहित न। कल नमीं दिल्ली च आयोजित संवाददाता सम्मेलन च IIT दिल्ली दे ड़ैक्टर रंजन बनर्जी होरें दस्सेआ जे प्रधानमंत्री होर इस संस्थान दे काबल विद्यार्थियें गी पुरस्कार भेंट करंडन। उ'नें इब्बी दस्सेआ जे प्रधानमंत्री होर IIT दिल्ली दे सोनीपत परिसर च स्थापित AI सक्षम बड़ी बधिया कारकरदगी आली सुपर- Computing सुविधा परम-प्रज्ञा दा वर्चुअल ढंगै नै उदघाटन करडन।



NPCI

भारती भुगतान परिशद-PCI नै आखेआ जे UPI दे माध्यम कन्नै कीते जाने आहले डिजिटल भुगतान उपभोक्ताएं आस्तै मुफ्त बने दे रौहगंन। बपारियें आस्तै डिजिटल भुगतान स्वीकार करने आस्तै कोई बी शुल्क नैई लैता जाग। परिशद नै दस्सेआ जे बैंकें, फिनटेक कम्पनिएं, NPCI ते भारती रिजर्व बैंक-UPI गी सुरक्षित ते भरोसेमंद बनाई रखने आस्तै तकनीकें, साइबर सुरक्षा, धोखाधड़ी रोकने ते नमीं सुविधाएं च लगातार निवेश करा'रदे न। PCI नै साफ कीता ऐ जे बपारिएं ते भुगतान सेवा प्रदाताएं बशकार होने आहला व्यवसायिक शुल्क दा भुगतान उपभोक्ताएं गी नैई करना होग। परिशद नै आखेआ ऐ जे UPI मुख्य दी महत्वपूर्ण डिजिटल बवस्था बनी चुके दा ऐ- जेदा इस्तेमाल करोड़ां-बददे लोक हर रोज़ करदे न। बदधे लैन-देन गी दिक्खदे होई सुरक्षा, तकनीक ते ढांचे गी मज़बूत बनाई रखना जरूरी ऐ तां'जे भविक्ख च बी UPI उपभोक्ताएं ते कारोबारिएं आस्तै बवस्थित ढंगै सिर कम्म करदा रवै।



Foreign Ministry

भारत ने बदेशी अंशदान विनियमन संशोधन बिल पर अमरीका दे सांसदे आसेआ जताए गेदे ऐतराज गी खारिज करी दिता ऐ। बदेश मंत्रालय दे प्रवक्ता रणधीर जायसवाल होरे आखेआ ऐ जे एह भारत दा अंदरूनी मामला ऐ ते एहदे पर फैसला भारत दी संसद करदी ऐ। उने आखेआ जे अमरीका सने केंड्रां होरनें मुल्खे च बी बदेशी पैहे दे प्रवाह गी नियंत्रित करने लेई कनून लागू न। भारती जहाजे ते नाविके दी सुरक्षा दे सरबंधे च जायसवाल होरे आखेआ जे भारत इस मामले गी सबने शा मती तरजीह दिंदा ऐ। भारत ने सबने पक्खे गी अपील कीती ऐ जे ओह नागरिक बुनियादी ढांचे सने जहाजे ते नाविके गी निशाना नेई बनान। पाकिस्तान, तुर्किये ते सऊदी अरब दे बशकार होए दे रक्षा समझौते पर श्री जायसवाल होरे आखेआ जे भारत ने इने घटनाएं पर नज़र रक्खी दी ऐ।



Shah -NUCFDS

केन्द्री गृह ते सहकारिता मंत्री अमित शाह अज्ज मुंबई च राश्ट्री शैहरी सरकारी वित्त ते विकास निगम- NUCFDC आसेआ आयोजिच सम्मेलन गी सम्बोधित करडन। इस दरान ओह निगम दे नमें बनाए गेदे दफ्तर दा उदघाटन बी करडन। सम्मेलन दा सरिस्ता BSE International Convention Centre च कीता जाहग। एहदे च शैहरी सरकारी बैंके, राज्य सरकार फेडरेशने दे नुमायंदे, नीतियां बनाने आले ते होर दुए सरबंधत पक्ख बी शामिल होगन। सम्मेलन च सहकारी बैंकिंग बवस्था गी मजबूत करने ते देशे

च आत्मनिर्भर सहकारी खेतर गी बढ़ावा देने पर चर्चा होग। शाह होर शैहरी सरकारी बैंकें च साईबर सुरक्षा गी तगड़ा बनाने लेई सुरक्षा संचालन केन्द्र दा बी उदघाटन करडन।

<><><><><><>

JPSC Protest

झारखंड च JPSC ते JSSC म्तेहानें च कथित अनियमितताएं गी लेइयै जारी छात्र आंदोलन बश्कार कल संजा सरकार ते विद्यार्थियें दे प्रतिनिधिमंडल बश्कार पैहली औपचारिक गल्लबात होई। इक डेढ़ घंटे तगर चली दी इस गल्लबात च विद्यार्थियें अपनियां मंगां रक्खियां। राज्य दे 4 मंत्रियें ते विकास कमिशनरें विद्यार्थियें कन्नै गल्ल कीती। मंत्रिएं आखेआ जे सरकार विद्यार्थियें दी मंगें गी पूरा करने लेई ते उन्दे आस्सेआ पुट्टे गेदे सारे जायज मामलें दा हल कइडने लेई वचनबद्ध ऐ। विद्यार्थियें गल्लबात गी सकारात्मक दस्सेआ पर आखेआ जे उन्दा आंदोलन लिखित तौर पर लैते जाने फैसले मगरा गें खत्म होग।

<><><><><><>

Joshi –Edu. Meeting

केन्द्रीय शिक्षा मंत्री प्रहलाद जोशी होरें आखेआ ऐ जे सरकार भारतीय शिक्षा बवस्था गी मज़बूत करने ते कार्यक्रमें गी समेंबद्ध ते असरदार ढंगै कन्नै लागू करने लेई प्रतिबद्ध ऐ। उ'नें कल रातीं शिक्षा मंत्रालयें दे वरिष्ठ अधिकारियें दी बैठक दी अध्यक्षता करदे होई एह गल्ल आक्खी। जोशी ब्रिक्स मुलखें दे शिक्षामंत्रियें दी 13मीं

बैठक मगरा दिल्ली परतोए न। सोशल मीडिया दी पोस्ट च जोशी होरें आखेआ जे बैठक च मंत्रालय दे मौजूदा कार्यक्रमें दी समीक्षा कीती गई।

<><><><><><>

US –Senate Bill

अमरीकी सीनेट ने रुस थमां तेल खरीदने आले चीन ते होरनें मुख्यें गी सजा देने सरबन्धी बिल पास करी दिता ऐ। एह दावा बन्नेआ जा'रदा ऐ जे चीन ते होर दुए किश मुख्य रुस कोला पेट्रोलियम उत्पाद खरीदा करदे न जेहदे करी रुस गी यूक्रेन खलाफ जंग च मदाद मिला करदी ऐ। लिंडसे ओ ग्राहम दे नांs पर रक्खे गेदे इस बिल दे समर्थन च 86 ते बरोध च छड़े 11 वोट पे। एह बिल अमरीकी राष्ट्रपति डोनाल्ड ट्रम्प होरें'गी रुस थमां तेल ते गैस खरीदने आले 5 बड्डे मुख्यें पर 100 फीसद शुल्क लाने दी इजाज़त देग। इस बिल च ईरान पर बंदिश सरबन्धी 1996 आले कनून गी बधाइयै 2031 तगर करने दी बी तजवीज़ ऐ। 1996 आले इस कनून च ईरान दे ऊर्जा खेतर च निवेश करने आली कम्पनियें पर जुर्माना लाने दा प्रावधान ऐ।

<><><><><><>

India-Srilanka

भात ते श्रीलंका नै बिजली क्षेत्र च दपक्खी सहयोग पर नमीं दिल्ली च समीक्षा बैठक कीती। बैठक च भारतीय प्रतिनिधिमंडल दी अगुआई केन्द्रीय विधुत ते शैहरी मामले दे मंत्री मनोहर लाल होरें कीती। श्रीलंका दे प्रतिनिधिमंडल दी अगुआई पत्तन ते नागर विमानन ते ऊर्जा मंत्री अनुरा करुणथिलाके होरें कीती। दौनें मंत्रिणं प्रस्तावित भारत-श्रीलंका हाई वोल्टेज डायरेक्ट करंट इंटरकनेक्शन ते सपूर सौर ऊर्जा परियोजना सनें

बक्ख-बक्ख परियोजनाएं दी प्रगति दी समीक्षा कीती। बैठक च सीमा पार बिजली बपार, नवीकरणीय ऊर्जा, बुनियादी ढांचा ते क्षमता निर्माण दे क्षेत्र च सहयोग बढ़ाने पर बी चर्चा होई। दौनें मुख्ये बिजली क्षेत्र च मौजूदा दपक्खी सहयोग दी समीक्षा करदे होई लगातार ते टिकाऊ विकास ते क्षेत्रिय ऊर्जा सुरक्षा आस्तै सहयोग ते मज़बूत करने दी प्रतिबद्धता दोहराई।

<><><><><><>

Korea Master's Badminton

कोरिया मास्टर्स सुपर 300 बैडमिंटन प्रतियोगिता च भारत दी अश्विनी चालिहा ते रक्शिता रामराज महिला सिंगल्स दे सेमीफाइनल च पुज्जी गेइयां न। सेमीफाइनल च दौने भारतीय खडारी आमने-सामने होगंन। अश्विनी नै क्वाटर फाइनल च जापान दी नम्बर इक खडारी हिना अकेची गी 3 गेम दे रोमांचक मुकाले च हराया। उत्थै गै रश्मिता रामराज नै हमवतन ते त्री वरीयता हासल तनवी शर्मा गी हराई खीरी 4 च थाहर बनाई।

मर्दे दे डब्लस आहले मुकाबले च भारत दी चुनौती खत्म होई गई ऐ कि जे भारत दे पृथ्वी कृष्णामूर्ति राय ते कृष्णा प्रसाद मलेशिया दे खडारिएं थमां हारी गए।

<><><><><><>

Keralam -Orange Alert

केरल दे सारे जिलें च अज्ज बी बरखा दी चेतावनी जारी कीती गई ऐ। आकाशवाणी संवाददाता दी रिपोर्ट मूजब सारे जिलें च 7 दिनें लेई बरखा सरबन्धी चेतावनी जारी कीती गई ऐ। अज्ज लेई कन्नूर, वायनाड, कोटामय, अलापुजा, कासगोड, कोजीकोड,

पथानमथिट्टा लेई अलर्ट जारी कीता गेदा ऐ। 50 किलोमीटर फीह घंटे दी रफ्तार कन्नै हवा चलने दी बी पेशनगोई कीती गेई ऐ।

<><><><><><>

IMD-Weather

मौसम विभाग नै अज्ज पूर्वी राजस्थान ते ओडिशा च च मौलेधार बरखा पौने दा अनुमान जाहिर कीता ऐ। हिमाचल प्रदेश, उत्तराखंड, पूर्वी उत्तर प्रदेश, पच्छमी राजस्थान, पूर्वी मध्य प्रदेश, झारखंड, छत्तीसगढ़, कोंकण, गोवा, तटीय आंध्र प्रदेश, केरल, माहे ते पूर्वोत्तर भारत दे किश हिस्सें च बी तेज बरखा होई सकदी ऐ। लक्ष्यद्वीप, उत्तरी आंतरिक कर्नाटक, तमिनाडू, पुदुचेरी ते कराईकल च अज्ज बिजली मिलकने ते तेज हवा कन्नै हलकी बरखा पौने दी संभावना ऐ।

<><><><><><>